

Na osnovu člana 49., člana 62. tačka c) i člana 74. Zakona o sportu u Bosni i Hercegovini, („Službeni glasnik BiH“, broj 27/08 i 102/09), a u vezi sa članom 98. stav 2. i 99. stav 1. i 3. Zakona o upravi („Službeni glasnik BiH“, broj 32/02 i 102/09), te imajući u vidu odredbe člana III/3b Ustava BiH, direktor Agencije za antidoping kontrolu Bosne i Hercegovine donosi

**I N S T R U K C I J U**  
**za provođenje i primjenu Svjetskog antidoping kodeksa 2015. i Pravilnika za borbu  
protiv dopinga u sportu u Bosni i Hercegovini**

**Član 1.**

(Predmet Instrukcije)

- 1) Ova Instrukcija donosi se radi provođenja i primjene Svjetskog antidoping kodeksa (u daljem tekstu: Kodeks) u Bosni i Hercegovini (u daljem tekstu: BiH) i Pravilnika za borbu protiv dopinga u sportu u BiH (broj: 01-02-2-1187/14 od 01.12.2014.godine) (u daljem tekstu: Sportska pravila) kojeg preporučuje, odobrava i čiju usklađenost sa Kodeksom potvrđuje Svjetska antidoping agencija (u daljem tekstu: WADA), a koji se objavljuje na oglasnoj ploči i internet stranici Agencije za antidoping kontrolu Bosne i Hercegovine (u daljem tekstu: Agencija), uključujući i njegove izmjene i dopune.
- 2) Odredbe članova Kodeksa 1, 2, 3, 4.2.2., 4.3.3., 7.11, 9, 10, 11, 13 (sa izuzetkom u pogledu primjene propisane Kodeksom za članove 13.2.2, 13.6 i 13.7), 15.1, 17 i 24, uključujući i Dodatak 1 kojim su utvrđene definicije pojmljiva, primjenjuju se neposredno na način propisan Kodeksom, Sportskim pravilima i ovom Instrukcijom.

**Član 2.**

(Zabrana dopinga u sportu)

- 1) Sportistima i svim učesnicima u sportu zabranjeno je korištenje, podsticanje na korištenje i davanje zabranjenih supstanci i zabranjenih metoda u skladu sa pravilima i međunarodnim standardima WADA, članom 49. Zakona o sportu u BiH i Kodeksom.
- 2) Doping u sportu, u smislu Kodeksa i Zakona iz stava 1) ovog člana, je postojanje jednog ili više kršenja antidoping pravila sadržanih u Kodeksu.

**Član 3.**

(Kršenje antidoping pravila prema Kodeksu)

Kršenje antidoping pravila postoji u slučajevima propisanim Kodeksom:

- (1) prisustva zabranjene supstance ili njenih metabolita ili markera u tjelesnom uzorku sportiste;
- (2) korištenje ili pokušaja korištenja (primjena, unošenje, ubrizgavanje ili konzumiranje na bilo koji način) zabranjene supstance ili zabranjenog metoda (u daljem tekstu: doping sredstva) od strane sportiste;
- (3) izbjegavanja, odbijanja, ili propuštanja davanja uzorka;
- (4) kršenja vezanih za neispunjavanje obaveze dostupnosti za testiranje;
- (5) neovlaštenog ometanja ili pokušaja ometanja bilo kojeg dijela doping kontrole;
- (6) nedozvoljenog posjedovanja doping sredstva;
- (7) neovlaštene prodaje, transporta, slanja, isporuke ili distribucije doping sredstva (bilo fizički, elektronski ili nekim drugim načinom) od strane sportiste, osoba koje pomažu sportisti ili posredstvom trećeg lica, bilo kojem licu koje je u ingerenciji neke organizacije u oblasti sporta, ili pokušaja takvih postupanja;
- (8) davanja ili pokušaja davanja, propisivanja ili pokušaja propisivanja bilo kojeg doping sredstva;

- (9) saučesništva, asistiranja, podsticanja, pomaganja, podržavanja, prikrivanja, stvaranja uslova ili bilo kojeg drugog vida učešća u kršenju ili pokušaju kršenja antidoping pravila ili u kršenju izrečene mjere zbog kršenje antidoping pravila, i
- (10) zabranjenog uudruživanja

Kršenje antidoping pravila po tačkama (1), (2), (6), (7), (8) i (9) ovog člana ne postoji u slučajevima odobrenih izuzeća u terapijske svrhe.

Pod osobama koje pomažu sportisti podrazumijevaju se učitelji, treneri, menadžeri, agenti, osoblje tima, zvaničnici, zdravstveni radnici i zdravstveni saradnici kao i drugo osoblje koje radi sa ili vrši tretman sportista koji učestvuju ili se pripremaju za sportsko takmičenje.

#### Član 4.

(Ovlaštene antidoping organizacije prema Kodeksu i zaštita podataka)

- 1) Pod ovlaštenom antidoping organizacijom, u skladu sa Kodeksom, u smislu ove Instrukcije, podrazumijeva se Agencija, WADA, nadležni međunarodni sportski savez, sportski savez u BiH i Olimpijski komitet BiH. Ovlaštena antidoping organizacija iz stava 1. ovog člana, u skladu sa zakonom:
  - a) prikuplja, čuva i vrši druge radnje obrade ličnih podataka sportiste i drugih lica u nadležnosti ovlaštene antidoping organizacije (ime i prezime, spol, datum rođenja, državljanstvo, broj ličnog dokumenta koji služi kao identifikacija sportiste prilikom doping kontrole, adresu prebivališta i boravišta, kontakt telefon, adresu elektronske pošte, granu sporta i sportsku disciplinu kojom se lice bavi, naziv sportskog kluba u kome se obavljaju sportske aktivnosti i fotografiju sportiste), uključujući i obradu posebno osjetljivih podataka (zdravstveno stanje sportiste, korištena medicinska sredstva), i
  - b) drugim ovlaštenim antidoping organizacijama prenosi lične podatke sportiste i drugog lica u nadležnosti ovlaštene antidoping organizacije koji su neophodni za provođenje doping kontrole, odobravanje izuzetaka za terapijske svrhe i sankcioniranje sportiste i drugog lica zbog kršenja antidoping pravila.
- 2) Zaštita podataka o ličnosti i privatnosti u provođenju ove Instrukcije ostvaruje se u skladu sa odredbama Zakona o zaštiti ličnih podataka, Kodeksom, Sportskim pravilima i međunarodnim standardima WADA.

#### Član 5.

(Doping kontrola)

- 1) Doping kontrola je postupak koji uključuje planiranje rasporeda doping kontrola, izbor sportista za doping kontrolu, prikupljanje i rukovanje uzorcima, laboratorijsku analizu, vođenje rezultata, pretrese i žalbe.
- 2) Doping kontrola organizira se tako da je isključena svaka mogućnost zamjene uzoraka ili manipulacije bilo kakve vrste.
- 3) Doping kontrola organizira se kako na takmičenjima tako i izvan takmičenja, najavljeno i nenajavljeno.
- 4) Doping kontrola provodi se uzimanjem uzoraka urina i krvi ili primjenom druge autorizirane tehnike za detektiranje doping sredstava.
- 5) Agencija uređuje, određuje, organizira i provodi doping kontrolu na sportskim takmičenjima i izvan sportskih takmičenja, osim one koju provodi nadležni međunarodni sportski savez na međunarodnim takmičenjima koja se organiziraju u BiH u skladu sa zakonom, Kodeksom i ovom Instrukcijom.

#### Član 6.

(Doping kontrolori)

- 1) Doping kontrolor je lice koje je certificirano i akreditirano od strane Agencije nakon procedure za izbor doping kontrolora koju propisuje Agencija u skladu sa Kodeksom, smjernicama WADA-e i ovom Instrukcijom.
- 2) Doping kontrolora koji ispunjava uslove za certificiranje Agencija akreditira na period od najduže dvije (2) godine.
- 3) Agencija može izdatu akreditaciju doping kontroloru staviti van snage i prije isteka perioda na koji je izdata, ako doping kontrolor naruši postupak doping kontrole, o čemu odluku donosi direktor Agencije.
- 4) Doping kontrola može se provoditi samo od strane certificiranih i akreditiranih doping kontrolora od strane Agencije ili druge antidoping organizacije koju je Agencija priznala kao ekvivalentnu.
- 5) Odluku o priznavanju iz prethodnog stava donosi direktor Agencije.

### **Član 7.**

(Određivanje organizacije odnosno ovlaštene laboratorije)

- 1) Agencija određuje organizaciju, odnosno ovlaštenu laboratoriju u kojoj će se obaviti analiza doping uzorka sportista, odnosno životinja koje učestvuju na takmičenjima.
- 2) Organizacija, odnosno ovlaštena laboratorija u kojoj se provodi doping analiza, mora posjedovati važeću homologaciju izdatu od strane ovlaštenog međunarodnog organa ili organizacije (WADA), a u postupku doping kontrole uzete uzorce mora skladištiti, njima rukovati i analizirati ih u skladu sa Kodeksom, Sportskim pravilima, ovom Instrukcijom i odgovarajućim međunarodnim standardima odobrenim od strane WADA-e.

### **Član 8.**

(Dužnosti Olimpijskog komiteta BiH prema Kodeksu)

- 1) Olimpijski komitet BiH je, na osnovu potpisane Izjave o Kodeksu Međunarodnog olimpijskog komiteta, preuzeo odgovornost za primjenu i provedbu odredbi prema kojima je dužan:
  - zahtijevati kao uslov za članstvo ili za priznavanje da su antidoping politike i pravila sportskih saveza u BiH u skladu sa važećim odredbama Kodeksa;
  - poštivati autonomiju Agencije i neće se uplitati u njene operativne odluke i aktivnosti, osim ako ovom Instrukcijom nije drugačije uređeno
  - tražiti od sportskih saveza u BiH da prijave Agenciji ili pripadajućem međunarodnom sportskom savezu bilo koju informaciju koja nagovještava ili se odnosi na kršenje antidoping pravila i sarađivati u istrazi sprovedenoj od Agencije
  - zahtijevati kao uslov za učešće na Olimpijskim igrama da, kao minimum, sportisti koji nisu redovni članovi sportskog saveza budu dostupni za davanje uzorka i da dostave podatke o lokaciji kako je propisano Međunarodnim standardom za testiranje i istrage što je prije moguće, nakon što se sportista nađe na proširenom spisku ili dodatnoj prijavi u vezi sa Olimpijskim igrama;
  - sarađivati sa Agencijom;
  - u saradnji sa Agencijom i nadležnim institucijama provoditi aktivnu podršku zajedno sa pripadajućom regionalnom antidoping organizacijom;
  - zahtijevati od sportskih saveza u BiH da donešu pravila kojima se zahtijeva od osoblja sportiste koje učestvuje u svojstvu selektora, trenera, menadžera, timskog osoblja, zvaničnika, medicinskog i paramedicinskog osoblja na takmičenju ili događaju odobrenom ili organiziranom od tog saveza ili neke njegove članice, da

- prihvate antidoping pravila i nadležnost antidoping organizacije za upravljanje rezultatima u skladu sa Kodeksom kao uslovom za članstvo u Olimpijskom komitetu BiH
- uskratiti isplatu dijela ili svih sredstava, tokom perioda njegove ili njene nepodobnosti, bilo kojem sportistu ili pomoćnom osoblju sportista koji su prekršili antidoping pravila;
  - uskratiti sva ili dio sredstava svojim članovima ili priznatim sportskim savezima koji nisu u skladu sa Kodeksom;
  - u potpunosti procesuirati sva potencijalna kršenja antidoping pravila u okviru svojih nadležnosti uključujući istragu o tome da li su pomoćno osoblje sportiste ili druge osobe uključeni u bilo koji slučaj dopinga u skladu sa ovom Instrukcijom;
  - promovirati antidoping edukaciju, uključujući i da odgovarajući sportski savezi sprovedu antidoping edukaciju u saradnji sa Agencijom
  - saradivati sa relevantnim nacionalnim organizacijama, agencijama i drugim antidoping organizacijama;
  - imati važeća disciplinska pravila kako bi spriječili pomoćno osoblje sportiste koje koristi doping sredstva bez važećeg opravdanja da pružaju podršku sportistima u okviru svoje nadležnosti.
- 2) Dužnosti Olimpijskog komiteta BiH iz stava 1) ovog člana primjenjuju se i na Paraolimpijski komitet BiH.

### Član 9.

(Dužnosti sportskih saveza)

Nadležni sportski savezi u BiH, u skladu sa Zakonom o sportu u BiH, pravilima WADA-e, Kodeksom, pravilima međunarodnih sportskih saveza, pravilima Međunarodnog olimpijskog i paraolimpijskog komiteta, pravilima Olimpijskog i Paraolimpijskog komiteta BiH, Sportskim pravilima i ovom Instrukcijom, dužni su:

- (1) da sportskim pravilima utvrde disciplinske mjere i urede postupak njihovog izricanja u slučajevima utvrđenog kršenja antidoping pravila, u skladu sa Zakonom o sportu u BiH, Kodeksom, Sportskim pravilima, pravilima nadležnog međunarodnog sportskog saveza i ovom Instrukcijom, najkasnije do 31.06.2015.godine;
- (2) da osiguraju, u okvirima svoje nadležnosti, da sportistima, sportskim stručnjacima i drugim osobama za koje je utvrđena odgovornost za kršenje antidoping pravila budu izrečene i sprovedene odgovarajuće disciplinske mjere u skladu sa Zakonom o sportu u BiH, Kodeksom, pravilima nadležnog međunarodnog sportskog saveza, Sportskim pravilima i ovom Instrukcijom;
- (3) da ne priznaju sportski rezultat u čijem postizanju je učestvovao dopingovani sportista;
- (4) da ne dozvole učešće na sportskoj prirebi sportisti, sportskom stručnjaku i drugom licu u ingerenciji sportskog saveza kojem je izrečena mjeru zbog kršenja antidoping pravila i kojem ta izrečena mjeru traje;
- (5) da donesu program antidoping djelovanja;
- (6) da sportskim pravilima i u saradnji sa Agencijom obezbijede da se članovi saveza, a posebno sportski stručnjaci i registrovani sportisti svih uzrasnih kategorija, neprekidno, a najmanje jedanput godišnje, obaveštavaju i educiraju o važećim propisima koji se odnose na doping u sportu i štetnim posljedicama po zdravlje upotrebe doping sredstava;

- (7) da odrede odgovorno lice za nadzor nad provođenjem kazni izrečenih licima koja su počinila kršenje antidoping pravila;
- (8) da najmanje 21 dan prije održavanja takmičenja koje organiziraju ili koje je pod njihovom kontrolom, prijave takmičenje Agenciji kao i da najkasnije do kraja tekuće godine dostave Agenciji kalendar takmičenja za narednu godinu;
- (9) da odmah po saznanju i najmanje jedanput u šest mjeseci obavijeste Agenciju o planovima treninga i priprema vrhunskih sportista i sportskih reprezentacija;
- (10) da uskrate u potpunosti finansiranje sportista, sportskih stručnjaka, sportskih organizacija i drugih lica koja ne poštuju važeća antidoping pravila u skladu sa Kodeksom;
- (11) da na kraju godine obavijeste Agenciju o mjerama za borbu protiv dopinga preduzetim u toku godine;
- (12) da u sportu u kome se takmiče životinje utvrde i sprovedu antidoping pravila za životinje koje učestvuju u tom sportu, u skladu sa zakonom, pravilima nadležnog međunarodnog sportskog saveza, Sportskim pravilima i ovom Instrukcijom,
- (13) da ne dozvole obavljanje bilo koje sportske aktivnosti i sportske djelatnosti ili bilo koje funkcije u okvirima nadležnosti saveza licu kojem je, u skladu sa zakonom, Kodeksom, Sportskim pravilima i ovom Instrukcijom izrečena mjera zbog kršenja antidoping pravila, za vrijeme trajanja izrečene mjere, odnosno kazne.
- (14) da odmah po saznanju ili odluci nadležnog disciplinskog tijela suspendiraju sportistu koji je prekršio antidoping pravila u skladu sa Kodeksom.

### **Član 10.**

(Dužnosti sportista)

- 1) Sportisti i drugi učesnici u sportu dužni su da dozvole i omoguće obavljanje doping kontrole.
- 2) Sportista je dužan da obavijesti liječnika koji ga liječi da je sportista i da mu je zabranjeno korištenje doping sredstava.
- 3) Sportista je dužan da se uvjeri da bilo kakva dobijena medicinska terapija ne sadrži doping sredstva.

### **Član 11.**

(Doping kontrola po zahtjevu)

- 1) Nadležni sportski savez, međunarodni sportski savez, organizacija ligaškog sportskog takmičenja, organizator sportskog takmičenja i sportska organizacija, odnosno sportista učesnik sportskog takmičenja, mogu zahtijevati i predložiti Agenciji da sproveđe doping kontrolu na određenim takmičenjima ili doping kontrolu izvan takmičenja određenih timova, trening grupa ili pojedinih sportista, uz snošenje troškova provođenja doping kontrole.
- 2) Odluku o provođenju doping kontrole prema zahtjevu i prijedlogu iz stava 1) ovog člana donosi direktor Agencije.
- 3) Troškovi doping kontrole iz stava 1) utvrđuju se odlukom direktora.

### **Član 12.**

(Doping kontrola izvan takmičenja )

- 1) Doping kontroli izvan takmičenja podliježu sportisti koji su u statusu olimpijskog kandidata, vrhunski i drugi sportisti, sportisti međunarodnog ranga, sportisti koji žele nastaviti sportsku karijeru nakon isteka mјere zabrane učešća na takmičenjima zbog dopinga, kao i druge kategorije sportista koje odredi Agencija (Registrvana test grupa).

- 2) Odluku o sportistima, članovima Registrovane test grupe donosi direktor Agencije za svaku kalendarsku godinu, a najkasnije do 15.12. tekuće godine za sljedeću kalendarsku godinu.
- 3) Obavještenje o Odluci iz stava 2) ovog člana se blagovremeno dostavlja sportistima, a najkasnije do 20.12. tekuće godine za sljedeću kalendarsku godinu.
- 4) Sportista koji se ne želi više baviti sportom dužan je o tome obavijestiti Agenciju i podnijeti zahtjev za brisanje iz Registrovane test grupe.
- 5) Doping kontrola izvan takmičenja provodi se:
  - a) na osnovu periodičnog plana kontrole kojeg donosi Agencija;
  - b) na osnovu posebne odluke Agencije,
  - c) na obrazloženi prijedlog sportiste, njegove sportske organizacije ili nadležnog sportskog saveza, uz snošenje troškova provođenja doping kontrole.
- 6) Sportisti koji podliježu kontroli izvan takmičenja u skladu sa stavom 1. ovog člana, dužni su da Agenciju redovno obavještavaju o svakoj promjeni mjesta boravišta i vremenu i mjestu održavanja treninga, u skladu sa Kodeksom, pravilima WADA-e, međunarodnim standardima, Sportskim pravilima i ovom Instrukcijom.
- 7) Svi učesnici u postupku doping kontrole dužni su da dobijene informacije čuvaju kao povjerljive i mogu ih koristiti isključivo u svrhe planiranja, koordiniranja i provođenja doping kontrole.
- 8) Za sva druga pitanja u vezi sa Registrovanom test grupom a koja nisu uređena ovom Instrukcijom primjenjuju se Kodeks, pravila WADA-e, međunarodni standardi, Sportska pravila, WADA modeli najbolje prakse i smjernice.

### Član 13.

(Izuzeća u terapijske svrhe)

- 1) Sportista može zatražiti od Agencije da ga osloboди zabrane upotrebe doping sredstava u slučaju kada postoji jasna i nužna medicinska potreba.
- 2) Agencija utvrđuje pravila za odobravanje izuzeća u terapijske svrhe, u skladu sa međunarodnim standardom za postupak odobravanja izuzeća u terapijske svrhe odobrenim od strane WADA-e.
- 3) O odobravanju izuzeća u terapijske svrhe Agencija donosi odluku, u skladu sa međunarodnim standardom iz stava 2. ovog člana i Pravilnikom o terapijskim izuzećima Agencije.

### Član 14.

(Disciplinske mjere)

- 1) Disciplinske mjere koje se izriču zbog kršenja antidoping pravila, u skladu sa Kodeksom, su:
  - a) diskvalifikacija sportskih rezultata;
  - b) privremena suspenzija;
  - c) zabrana učešća na takmičenjima;
  - d) zabrana obavljanja poslova u oblasti sporta, i
  - e) druge mjere utvrđene Kodeksom i sportskim pravilima nadležnih sportskih saveza u BiH i međunarodnih sportskih saveza.
- 2) Licu koji je odgovorno za kršenje antidoping pravila, mjere iz stava 1. ovog člana izriču se u skladu sa Kodeksom, ovom Instrukcijom, Sportskim pravilima i drugim aktima koji uređuju ovu oblast.
- 3) Mjere iz stava 1. tački c), d) i e) ovog člana neće biti izrečene ako lice kojem se stavlja na teret kršenje antidoping pravila dokaže da nije krivo, odnosno da kod njega nije bilo namjere ili nepažnje u skladu sa Kodeksom.

## **Član 15.**

(Zabrane)

Nijedno lice kojem je izrečena mjera zbog kršenja antidoping pravila ne može, za vrijeme trajanja mјere, učestvovati u bilo kom svojstvu i u bilo kom sportu, na sportskim priredbama ili u aktivnostima (izuzev u ovlaštenim programima antidoping obrazovanja i rehabilitacije) u ingerenciji ovlaštenih antidoping organizacija, kao i onih koje organiziraju ili dozvoljavaju organizacije u oblasti sporta u BiH, osim ako je pravilima Kodeksa i nadležnih međunarodnih sportskih saveza drugačije određeno.

## **Član 16.**

(Lista zabranjenih sredstava)

- 1) Agencija utvrđuje, najmanje jedanput godišnje, Listu zabranjenih sredstava za sportiste, u skladu sa Evropskom konvencijom o sprečavanju dopinga u sportu i međunarodnim standardom za listu zabranjenih sredstava odobrenom od strane WADA-e, koju objavljuje u Službenom glasniku BiH i na zvaničnoj internet stranici Agencije.
- 2) Agencija utvrđuje, najmanje jedanput godišnje, Listu zabranjenih sredstava za životinje (referentne liste zabranjenih farmakoloških klasa doping supstanci i doping metoda), u skladu sa sportskim pravilima nadležnih međunarodnih sportskih saveza za sport u kojem učestvuju životinje, a koju objavljuje na zvaničnoj internet stranici Agencije.

## **Član 17.**

(Procesuiranje kršenja antidoping pravila)

Postupak utvrđivanja odgovornosti za kršenje antidoping pravila se provodi u skladu sa Kodeksom, Sportskim pravilima, koje je odobrila i čiju je usklađenost sa Kodeksom potvrdila WADA, ovom Instrukcijom i Pravilnikom o utvrđivanju odgovornosti lica koja su počinila kršenja antidoping pravila, a kojeg donosi direktor Agencije i koji se objavljuje na oglasnoj ploči i internet stranici Agencije, uključujući i njegove izmjene i dopune.

## **Član 18.**

(Primjena)

- 1) Ova Instrukcija primjenjuje se na sljedeća lica (uključujući maloljetnike), neovisno o tome da li je osoba državljanin BiH ili ima prebivalište u njoj:
  - a) sve sportiste i prateće osoblje sportiste koji su članovi ili imaju iskaznicu bilo kojeg sportskog saveza u BiH, bilo koje organizacije članice ili bilo koje podružnice sportskog saveza u BiH (uključujući sve klubove, timove, udruženja i lige);
  - b) sve sportiste i prateće osoblje sportiste koji učestvuju u tom svojstvu na događajima, takmičenjima ili u drugoj aktivnosti koju organizira, saziva, odobrava ili priznaje bilo koji sportski savez u BiH, bilo koja organizacija članica ili podružnica bilo kojeg sportskog saveza u BiH (uključujući sve klubove, timove, udruženja i lige), gdje god da se održava;
  - c) sve ostale sportiste, prateće osoblje sportiste te druge osobe koje su na osnovu akreditacije, dozvole ili druge vrste ugovora odnosno na drugi način pod nadležnošću sportskog saveza u BiH ili bilo kojeg člana ili organizacije sportskog saveza u BiH (uključujući sve klubove, timove, udruženja i lige) u svrhu antidopinga, i
  - d) sve sportiste i prateće osoblje sportiste koji u bilo kojem svojstvu učestvuju u nekoj od aktivnosti koju organizira, održava, saziva ili odobrava organizator sportskog događaja ili liga koja nije povezana sa sportskim savezom.

- 2) Ova Instrukcija primjenjuje se i na sve sportiste i prateće osoblje sportiste na koje se ne odnosi odredba prethodnog stava ovog člana, ali koji žele učestvovati na međunarodnim i događajima u BiH.
- 3) Ova Instrukcija primjenjuje se i na druga lica, u skladu s Kodeksom, uključujući sve sportiste koji su državlјani BiH ili imaju prebivalište u BiH i sve sportiste koji se nalaze u BiH radi takmičenja ili treninga.
- 4) Pod pratećim osobljem sportiste, u smislu ove Instrukcije, podrazumijevaju se učitelji, treneri, menadžeri, agenti, osoblje tima, zvaničnici, zdravstveni radnici i zdravstveni saradnici i drugo osoblje koje radi sa ili vrši tretman sportista koji učestvuju ili se pripremaju za sportsko takmičenje.
- 5) Obaveze utvrđene Kodeksom, Sportskim pravilima i ovom Instrukcijom analogno se primjenjuju i na doping kontrolu životinja koje učestvuju u sportskim takmičenjima.

### Član 19.

(Usklađenost)

Ova Instrukcija usklađena je sa Zakonom o ratifikaciji Evropske konvencije protiv dopinga u sportu (Službeni list SFRJ - Međunarodni ugovori, broj 04/91, Odlukom Predsjedništva BiH o ratifikaciji Međunarodne konvencije protiv dopinga u sportu („Službeni glasnik BiH“, broj 02/09), Zakonom o sportu u BiH („Službeni glasnik BiH“, broj 27/08 i 102/09), Kodeksom i međunarodnim standardima za doping kontrolu odobrenim od strane WADA-e i Sportskim pravilima.

### Član 20.

(Prelazne i završne odredbe)


- 1) Ova Instrukcija donosi se radi provođenja i primjene Kodeksa i Sportskih pravila i ostaje na snazi do donošenja posebnog zakona kojim će se urediti ova oblast, u dijelu u kojem ne bude suprotna odredbama tog zakona.
- 2) Za sva pitanja koja nisu regulirana ovom Instrukcijom primjenjuje se Kodeks, Zakon o sportu u BiH, Sportska pravila, pravila WADA-e, međunarodni standardi, pravila međunarodnih sportskih saveza, Međunarodnog olimpijskog komiteta, Međunarodnog paraolimpijskog komiteta, Olimpijskog komiteta BiH, Paraolimpijskog komiteta BiH, pod uslovom da su usklađena sa Kodeksom i Sportskim pravilima.
- 3) Komentari sadržani u Kodeksu imaju jednaku pravnu snagu kao i njegove odredbe povodom kojih su dati.

### Član 21.

(Stupanje na snagu)

- 1) Izmijenjeni i dopunjeni Kodeks stupa na snagu 01.01.2015.godine.
- 2) Ova Instrukcija stupa na snagu 01.01.2015. godine i objavljuje se u Službenom glasniku BiH, oglasnoj ploči i na internet stranici Agencije.

Broj: 01-02-2-1095/14  
Tuzla, 01.12.2014. godine



DIREKTOR

Slavko Matić